

Hitzarmenak

Euskaltzaindiak 2020an sinatu dituen lankidetzahitzarmenak

Euskaltzaindiak eta UZEIk lankidetzahitzarmen berria sinatu dute

Andres Urrutia euskaltzainburuak eta UZEIko lehendakari Jon Etxabek sinatu dute bi erakundeen arteko hitzarmen berria. Orain arteko lankidetzaren sendotu eta zabaltzen duen hitzarmena telematikoki sinatu dute, COVID-19aren pandemiari aurre egiteko hartutako neurriak direla eta.

Bi erakundeok harreman estua izan dute urte luzez, eta Euskaltzaindiaren erakunde atxikia da UZEI, Akademiaren Osoko bilkurak iaz hartutako erabakiaren ondorioz.

Elkarrekin izenpetutako azken lankidetzahitzarmena 2013koa zen. Besteak beste, lexikografiaren arloan euskararen corpusa ikertzen, zabaltzen, eguneratzen, elikatzen eta euskararentzat berriagoak diren eremuetan (eremu digitala) baliatzeko lanabesak sortzen aritu dira lankidetzan: *Euskaltzaindiaren Hiztegia*, Lexikoaren Behatokia, XX. mendeko Euskararen Corpus Estatistikoa eta Euskaltzaindiaren lanetarako ingurunean (*Euskaltzaindiaren Hiztegia* eta *Orotariko Euskal Hiztegia* zuzentzeko eta eguneratzeko inguruneak).

Orain sinatu den hitzarmen berriak hiru arlo hauetan lankidetzaren areagotzea du helburu: batetik, abian diren ikerketetan sakontzea eta ildo berriak irekitzea, bestetik, ezagutzaren transferentzia, eta, azkenik, egitasmo eta aplikazio berriak abian jartzea, bereziki, eremu digitalean.

Sare sozialetan ere lankidetzan

Elkarrekin landutako mezuak edo pilulak ere sare sozialetan jartzen hasiko dira Euskaltzaindia eta UZEI, euskararen erabilerari buruzko ohiko zalantzak argitzeko hitzunen eskura jarritako baliabideak ezagutarazteko. *Euskara Batuaren Eskuliburua*, Jagonet zerbitzuko galde-erantzunak, *Euskaltzaindiaren Hiztegia* eta arauak izango dira mezu horien oinarri nagusiak.

Koronabirusaren oinarritzko lexikoa ere plazaratu berri dute bi erakundeok, egunotan hizpide nagusia bihurtu den gaitzaren inguruko hitz eta termino oinarritzkoenak biltzen dituen. Lexikoa Euskaltzaindiaren eta UZEIren webguneetan dago eskuragarri.